


DS
793
K42L856
1740
v.2



龍虎山志卷六

妙正真人婁近垣三臣重輯 徒惠遠謨虛中校
天師世家

猗惟天師印劍世傳繩繩繼繼歷載逾千嗣雷埒
孔道炳賞延世家之立肇自峴泉厥後續緝得失
半焉刪冗削穢附採他編庶幾徵信懿美昭宣志
世家

一代天師道陵字輔漢沛國豐人也漢畱文成侯良九
世孫父桐栢真人諱大順母劉氏夢神人以薔薇香授
之感而有娠漢建武十年正月十五日生天師於吳之

天目山身長九尺二寸七歲通道德五千言既長於天文地理圖書讖緯之祕咸貫通焉從學者千餘人天目山南三十里西北八十里皆有講學之堂臨安神山觀餘杭通仙觀即其地也後自浙踰淮涉河洛得鍊形合氣之書辟穀不寐永平中拜江洲令謝官歸洛陽北邙山章帝和帝屢徵不就與弟子王長遊鄱陽沂流入雲錦山鍊九天神丹丹成而龍虎見山因以名時年六十餘餌之容貌益少有神人自稱趙公明從黑虎詣前曰願永護丹扃訪西仙源得制命五嶽檄召萬靈及神虎祕文於碧魯洞復往嵩山石室得三皇內文黃帝九鼎

丹書太清丹經入蜀居陽平山能飛行遠聽分形散影
居西城山築壇壇以降五帝居葛嶺山隱形岩舍服氣
調神居秦中山修九真祕法居昌利山採服五芝衆藥
居隸上山授弟子養形輕身法居涌泉山得出入水火
之術居真都山思神念真居北平山有猛獸數百馴擾
戶外居稠稔山有一老翁化爲獐鬼來恐天師天師誦
經不顧逡巡自退居鶴鳴山服五雲氣感太上授以經
籙印劍其間石鶴鳴則有昇天者先是章和閒其鶴鳴
焉居渠亭山鍊九鼎神丹居主簿山神人夜獻玉璧居
本竹山衆真降授靈寶經居漓沅山爲說經臺居鹿堂

山鍊九轉神丹居平蓋山合九華大藥至成都地湧玉
局太上復降說諸經要先是西城白虎神好飲人血每
歲鄉人殺人以祭梓州有大蛇鳴則山谷震噓氣數里
中者輒死天師召其神戒之而誅蛇陽山大湫有毒龍
書符投之龍舍湫去而湫涸挿劍其下遂成鹽井收十
二神女作井神授民以煮鹽之法民收其利過宋江錄
神奸之名鎖其為民害者復篆太山符以鎮焉後人呼
為擯鬼符水涸時人多見之以神印封鬼市立二十四
治以應二十八宿正氣以六十甲子生人分屬各治定
三十六靖廬七十二福地三百六十名山品秩各置神

司之永壽二年以經籙印劍付子衡戒之曰吾遇太上
親傳至道此文總領三五步置正一樞要世世一子紹
吾之緒非吾家宗親子孫不傳於雲臺峯與夫人雍氏
乘雲上昇在人間者一百二十三歲女文姬文光賢姬
芳芝皆得道上昇

舊世家云永平二年以直言極諫科中之永元初
徵爲太傅冀縣侯按漢惟元帝初元二年詔舉直
言極諫東漢未嘗以此設科也諸侯亦無以縣字
入封號者太傅非尊寵大臣不拜俱不足據刪之
又王莽禁名故東漢人名皆一字後漢書三國志

亦作張陵而道家諸書俱曰道陵按葛洪神仙傳云張道陵者沛國豐人也本太學書生博通五經晚乃歎曰此無益於年命遂學長生之道得黃帝九鼎丹法欲合之用藥皆靡費錢帛陵家素貧欲治生營田牧畜非己所長乃不就聞蜀人多純厚易可教化且多名山乃與弟子入蜀住鵲鳴山著作道書二十四篇乃精思鍊志忽有天人下千乘萬騎金車羽蓋驂龍駕虎不可勝數或自稱柱下史或稱東海小童乃授陵以新出正一盟威之道陵受之能治病於是百姓翕然奉事之以爲師弟

子戶至數萬即立祭酒分領其戶有如官長并立
條制使諸弟子隨事輪出米絹器物紙筆樵薪什
物等領人修復道路不修復者皆使疾病縣有應
治橋道於是百姓斬草除溷無所不爲皆出其意
而愚者不知是陵所造將謂此文從天上下也陵
又欲以廉恥治人不喜施刑罰乃立條制使有疾
病者皆疏記生身以來所犯之罪乃手書與神明
共盟約不得復犯法當以身歿爲約於是百姓計
愈邈迨疾病輒當首過一則得愈二使羞慙不敢
重犯且畏天地而改從此之後所違犯者皆改爲

善矣陵乃多得財物以市其藥合丹丹成服半劑
不願即昇天也乃能分形作數十人其所居門前
水池陵常乘船遊戲其中而諸道士賓客往來盈
庭蓋座中常有一陵與賓客對談共飲食而真陵
故在池中也其治病事皆採取元素但改易其大
較轉其首尾而大途猶同歸也行氣服食故用仙
法亦無以易故陵語諸人曰爾輩多俗態未除不
能棄世正可得我行氣導引房中之事或可得服
食草木數百年之方耳某有九鼎大要惟付王長
而後合有一人從東方來當得之此人必以正月

七日日中到具說長短形狀至時果有趙昇者恰從東方來生平願相見其形貌亦如陵所說陵乃七度試昇皆過乃授昇丹經七試者第一試昇到門不爲通使人辱罵四十餘日露宿不去乃納之第二試使昇於草中守黍驅獸暮遣美女非常託言遠行過寄宿與昇接牀明日又稱脚痛不去遂畱數日亦復調戲昇終不失正第三試昇行道忽見遺金三十餅昇乃走過不取第四試令昇入山採薪三虎交前咬昇衣服惟不傷身昇不恐顏色不變謂虎曰我道士耳少年不爲非故不遠千里

來事神師求長生之道汝何以爾也豈非山鬼使
汝來試我乎須臾虎乃起去第五試昇於市買十
餘疋絹付值訖而絹主誣之云未得僭昇乃脫已
衣買絹而僭之殊無恡色第六試昇守田穀有一
人往叩頭求食衣裳破弊面目塵垢身體瘡膿臭
穢可憎昇愴然爲之動容解衣衣之以私糧設食
又以私米遺之第七試陵將諸弟子登雲臺絕巖
之上下有一桃樹如人臂傍生石壁下臨不測之
淵桃大有實陵謂諸弟子曰有能得此桃實當告
以道要於時伏而窺之者二百餘人股戰流汗無

敢久臨視之者莫不却退而還謝不能得昇一人
乃曰神之所護何險之有聖師在此終不使吾死
於谷中耳師有教者必是此桃有可得之理故耳
乃從上自擲投樹上足不蹉跌取桃實滿懷而石
壁險峻無所攀緣不能得返於是乃以桃一一擲
上正得二百二顆陵得而分賜諸弟子各一陵自
食一畱一以待昇陵乃以手引昇衆視之見陵臂
加長二三丈引昇昇忽來還乃以向所畱桃與之
昇食桃畢陵乃臨谷上戲笑而言曰趙昇心自正
能投樹上足不蹉跌吾今欲自試投下當應得大

桃也衆人皆諫惟昇與王長默然陵遂投空不落
桃上失陵所在四方皆仰上則連天下則無底往
無道路莫不驚歎悲涕惟昇二人良久乃相謂曰
師則父也自投於不測之淵吾何以自安乃俱投
身而下正墮陵前見陵坐局脚牀斗帳中見昇長
二人笑曰吾知汝來乃授二人道畢三日乃還歸
治舊舍諸弟子驚悲不息後陵與昇長三人皆白
日冲天而去衆弟子仰視之久而乃沒於雲霄也
初陵入龍虎山合丹半劑雖未冲舉已成地仙故
欲化作七試以度趙昇乃如其志也

又列仙傳略云漢順帝漢安元年正月十五日天
師夢見一人帶夜光之甲冠通天之幘執命魂三
氣之幘曰咄咄道陵聖駕待子天師驚起瞪目東
瞻紫雲之上有素車一乘駕五白龍車前對立玉
女執命魔之幘次立二童執召仙之幘復次二人
執倒景之節前立一人捧三五斬邪雌雄二神劍
車右一人捧陽平治都功印其餘翼衛侍從莫知
其數車中一人容儀若冰玉手執五明寶扇項負
八景圓光身長丈六餘神光照人不可正視車前
一人勅天師曰此太上老君也天師前拜老君告

曰蜀中有六大鬼帥枉暴生民子可為吾攝邪歸
正分別人鬼以福生民授以正一盟威祕籙三清
衆經符籙丹竈祕訣雌雄二劍都功印二儀交泰
冠魚鬣衣令制科律佐國行化天師按法遵修千
日內顧五臟外集三萬六千神又感清和玉女教
以吐納清和之氣攝伏精邪行籙中三步九跡魁
罡七元交乾履斗之道隨其所指隱遁出沒皆得
自然遂依告命戰鬼於蜀時有八部鬼帥各領鬼
兵動億萬數周行人間噓毒嘯禍暴殺萬民青城
山巔有鬼市人鬼合雜布行疫癘天師至衆鬼即

持兵刃矢石來害天師天師舉手一指化爲一大
蓮花拒之又持火千餘炬來鬼反自燒天師以丹
筆遙畫鬼陣鬼衆皆仆鬼帥叩頭求生以丹筆倒
書之鬼衆復蘓天師曰汝等自今可速遠避毋復
行禍人間不然誅無畱種鬼帥不服會六大魔王
復來環攻天師復以丹筆一畫鬼衆悉死惟六大
魔王仆地不能起仍叩頭求生天師倒筆再畫群
鬼悉起拱立懾服天師更欲盡服其心與各試法
力天師投身大火中足履青蓮而出鬼帥投身爲
火所燒天師入木身度木外木即隨合鬼帥投身

即墜於地天師入水乘黃龍而出鬼帥入水爲水
所溺天師以身入石透石而出鬼帥投身纔入一
寸天師以身入鐵山透鐵而出鬼帥纔入半寸天
師咒神符一道左手指之鬼斃右手指之復生鬼
帥舉手指之無復生死鬼帥化八大虎天師化二
獅子逐之又化八大龍天師化金翅鳥啄龍目睛
又化一大神鬚鬚震吼雙持大槌欲擊天師天師
乃化金剛身持杵擬大神大神退走鬼帥等騰身
十二丈即墜天師騰空高百丈鬼帥作五色雲昏
暗天地不見光明天師化五色瑞日炎光暉灼雲

即流散鬼帥變現窮盡更無所爲天師化一大石
以藕絲懸之徧滿鬼帥營上二鼠爭啣其絲欲壓
鬼帥同聲哀告願當遠去不敢害民遂會盟於青
城山黃帝壇下使人處陽明鬼處幽暗刻石作天
地日月之形誓曰天地交日月合然後汝可復出
以神印封鬼營市使不得相通鬼衆躊躇不去天
師口勅神符兵馬風刀立至諸鬼滅影而走立二
十四治每治立仙官陰官分掌世人罪福由是善
惡報應如影響焉

又道教相承次第錄第一代老君第二代王君第

三代章震第四代若士第五代李元君第六代諸
仙別傳分散世絕系治官氣並治名老君念於志
學之子再下平蓋山授張陵爲雲臺治火芝火仙
之經方術變化長生不死之藥登昇雲天之道勅
陵爲第六代之外孫而東海小童君爲陵保舉師
太上老君爲度師度雲臺治封陵爲天師天師授
三百人惟三人系代行政治張申王昇李忠

唐順之左編張道陵真人至蒼溪縣雲臺山謂王
長曰此山乃吾成功飛騰之地遂卜居永壽二年
道成於山半崖舉身躍入石壁中自崖而出因成

二洞崖半曰峻仙洞崖上曰平仙洞是年九月九日謂王長趙昇曰吾有餘丹汝可分飭今日當隨我矣遂乘雲上昇長昇侍焉

太平廣紀張道陵以蜀多名山携家遊之以其地爲二十四化身居北平化而妻孫氏居陽平化

按此與世家不同今張氏世紀正一女師爲雍氏則廣紀是誤也姑錄以備考

杜光庭道教靈驗記陵州天師井本傳云天師經行山中有十二玉女來謁天師願奉箕帚天師知其地下陰神也謂之曰汝等何以爲獻將觀汝心

厚薄選而納焉玉女各持一玉環徑皆數寸天師
曰所獻一般不可併納吾化此十二環令作一環
投之入地有得之者即納之焉遂合十二環爲一
大環徑餘一尺投於地中隨即深陷已成井矣玉
女皆脫衣入井以探玉環竟不能得天師取其衣
藏石匱中玉女至今只在井內今陵州鹽井直下
五百七十尺透兩重大石方及鹹水每年一度淘
洗其中須歌唱喧聒然後入井不然必見玉女裸
居井中見者多所不利井既深不可數入或絙索
斷損皮囊墜落惟於天師前炷香良久玉女自與

挂之依舊不失頃年井屬東川有張常侍主其鹽
務於事稍急鹽課不登欠數千觔交替之後縻畱
填納未得解去其人素亦崇道因與虔告天師云
張所欠之鹽家資已盡空此畱滯益恐困窮於三
五日內願借神力增加所出爲其填納與張俱拜
祈訴懇切自此每日所煎水數四十五畝如常而
鹽數羨溢五六日內填之果足此後一如舊數無
復增減矣十二王女戌亥二人在天惟十人在井
所煎鹽至戌亥時亦歇天師初以茲地荒梗無人
安居山川亦貧不可耕植化鹽井以救窮民民聚

居井傍戶口日衆遂置州統之以天師名故曰陵
州天師誓曰我所化井以養貧民若官奪其利千
年外井當陷矣今諸井皆有天師玉女之像焉

舊世家南唐齊王夢墮井中有道士碧眼長髯衣
絳衣挾出之占曰此漢天師也遂即龍虎山建祠
宇賜水田

二代嗣師衡字靈真有長才詔徵黃門侍郎不就居陽
平山以經籙授弟子彰正一之道其爲人治病請禱之
法書病人姓名說服罪之意作三通其一上之天著山
上其一埋之地其一沈之水謂之三官手書漢元和已

未戒子魯曰汝祖以天地爲心生靈爲念周行天下除妖孽之爲民害者是以親遇聖師建立大教嗣我教者非誠無以得道非敬無以立德非忠無以事君非孝無以事親汝其遵守成訓勿替引之魯拜稽首曰祖師志願宏博因家立教身爲法嗣敢不祇承用宏元化受印劍訖嗣師與妻盧氏白日上昇

張氏家譜云桓帝時拜郎中遷太史作渾天儀按渾天儀乃張平子所作以同姓名而誤載故不安引

三代系師魯字公祺嗣師長子也少膺祖訓以道術教

人從者益衆以祭酒爲理民夷信向鎮漢中者三十餘
年晚以印劍授子盛曰大江之東雲錦山亦名龍虎山
祖師正一元壇在焉汝可以印劍經籙徃住其地永宣
祖教以傳於世後師於北斗峯乘龍上昇

舊世家云詔授典農校尉又詔命爲漢中南鄭二
郡太守魏太祖拜爲梁益二州刺史按南鄭漢縣
非郡安得有太守漢十三部改周梁州曰益州至
晉太康平吳之後始分梁益爲二州漢末不應有
梁州也又云弟衛字公則爲昭義將軍傀字公仁
蔭封南郡太守加駙馬都尉子五人閭圃等皆侯

俱不受按弟衛雖見魏志本傳不言爲昭義將軍
但言五子皆侯不言蔭弟傀明言子富嗣侯而此
云不受俱與正史不合削之而節錄魏志本傳於
後

三國志本傳張魯字公祺沛國豐人也益州牧劉
焉以魯爲督義司馬擊漢中太守蘓因遂據漢中
自號師君其來學道者初皆名鬼卒受本道已信
號祭酒各領部衆多者爲治頭大祭酒皆教以誠
信不欺詐有病自首其過諸祭酒皆作義舍如今
之亭傳又置義米肉懸於義舍行路者量腹取足

若過多鬼神輒病之犯法三原然後乃行刑不置
長吏皆以祭酒爲治民夷便樂之雄據巴蜀垂三
十年漢末寵魯爲鎮民中郎將領漢寧太守通貢
獻而已群下欲尊爲漢寧王功曹巴西閭閻諫曰
漢川之民戶出十萬財富土沃四面險固上匡天
子則爲桓文次及竇融不失富貴今承制勢足斬
斷不煩於王願且不稱勿爲禍先魯從之韓遂馬
超之亂關西民從子午谷奔之者數萬家建安二
十年太祖乃兵自散關出武都征之至陽平關魯
欲舉漢中降弟衛不肯率衆數萬人拒關堅守太

祖攻破之遂入蜀魯遂避兵南山入巴中左右欲
悉燒寶貨倉庫魯曰本欲歸命國家而意未達今
之走避銳鋒非有惡意寶貨倉庫國家之有遂封
藏而去太祖入南鄭甚嘉之又以魯本有善意遣
人慰諭魯盡將家出太祖逆拜鎮南將軍待以客
禮封關中侯邑萬戶封五子閭圃等爲列侯爲子
彭祖娶魯女魯薨謚之曰原侯子富嗣

又范曄後漢書魯字公旗備考

又典略載魯在漢中因其民信行修業教使作義
舍以米肉置其中以止行人又教使自隱有小過

者當治道百步則罪除又依月令春夏禁殺又禁酒

陶弘景真誥曰張鎮南在北洞北石壇上燒香禮拜因伏而不起遂乃夜解明旦視形如生此壇今猶存歷然也

酈道元水經注載瀘水北發武都氏中南經張魯城東魯沛國張陵孫陵學道於蜀鶴鳴山傳業衡衡傳於魯魯至行寬惠百姓親附初平中劉焉以魯爲督義司馬往漢中斷絕谷道用建城治因即穀嶺周圍五里東臨濬谷杳然百尋西北二面連

峯接崖莫究其極從南爲盤道登陟二里有餘瀝
水又南逕張魯治東水西山上有張天師堂至今
民祀之庾仲雍謂山爲白馬塞堂爲張魯治東對
白馬城一名陽平關

列仙傳曰張魯仕漢爲漢中太守後隱身學道以
符法治病致米一斗病立愈久之積米鉅萬曹操
遣將攻漢中魯以手版畫地成河怒濤洶湧兵不
得渡其將率水兵將至岸魯又以手版畫河中輒
聳一峯高千餘丈兵不能進後加修鍊白日昇天
四代盛字元宗系師第三子魏太祖授奉車都尉散騎

侍郎封都亭侯不受攜印劍經籙自漢中還都陽龍虎
山修治祖天師元壇及丹竈故址遂家焉每歲以三元
日登壇傳籙四方從學者千餘人自是開科範以爲常
既化去踰年復於賀州爲廣王說法今臨賀丹霞觀遺
跡存焉配何氏

五代昭成字道融學道不懈能端坐一室神遊數百里
虎豹逢之皆伏壽一百一十九既化後或見騎鶴遊空
中啓塚視之惟冠履畱耳配盧氏

六代椒字德馨博通儒書晉安帝累徵不起嘗遊鄱湖
月夜一老翁來謁曰聞師以仙道立教乞示蘊奧以啓

昏愚告之曰學道皆由皈依教而入然質心於戒莫若質
戒於心則萬法皆空一真常在翁起謝去俄而異光照
耀失翁所在從者驚疑叔笑曰此龍伯也水族是主大
道未聞故來請耳居山時多神異之迹年百餘歲尸解
去配姚氏

七代回字仲昌初能言即問道是何物衆不能答慨然
失笑五歲欲傳經籙父曰且讀儒書對曰祖書不讀讀
他書何爲十歲嗣教辟穀日行數百里後入青城山不
知所終配毛氏

八代迴字彥超丰姿俊美德量天成請禱者無貴賤皆

不吝輒有神應北魏太祖嘗召赴闕問道年九十配李氏

九代符字德信端肅明達博覽經傳子史經籙尤顯於時年九十三配金氏

十代子祥字麟伯仕隨爲洛陽尉棄官嗣教能吐丹置掌中光芒穿屋尋復咽之嘗遊河洛登嵩山中峯石室夜聞兵騎聲有神來謁自稱東嶽主者曰昔會聖師於青城今四百餘載自魏晉以來亂離已久生靈受害罪業牽纏無由解脫乞廣宣符籙庶俾超化還山分遣弟子宣化四方壽一百二十配錢氏

十一代通元字仲達天性靜默常獨坐一室非時不出
雖家人罕識其面歲大疫以標植水中汲飲者皆愈乞
符水者不遠千里而至年九十七配周氏

十二代恆字德潤好讀書經史過目輒不忘唐高宗召
問治國安民之道對曰能無爲則天下治矣帝嘉之一
日自闕潛歸歎曰幾落世網今還吾素矣恆善幻術嘗
置甕於室對妻子茹葷飲酒夜發甕皆在甕中經日不
壞自言吾神仙之狡獪者年九十八配許氏

十三代光字德昭居石室修鍊垂三十年嗣教後乃還
家傳授經籙居常蔬食後辟穀年一百有四配左氏幼

子梧字君明亦辟穀能飛行往來後不知所終

十四代慈正字子明天資明敏常以易道教人修道聖井山惟三元日出傳經籙朝廷屢徵不赴年百餘聞空中仙樂下迎而化今所居號徵君山配龔氏

十五代高字子龍姿宇超曠好酒縱飲一石不醉嘗忘玉印長安酒家有少年力舉之不能動明日高至笑攜去唐明皇召見命即京師置壇傳籙賜金帛免租稅肅宗降香帛建醮山中年九十三配周氏

十六代應韶字治鳳精修至道能百日不食隱居山南龍鬚井上躬耕自娛每據石吹鐵笛聲聞數里一日懸

笛井上端坐而逝葬井傍今有仙人墓竈枸樹門在焉
所耕處號黃砂坑配秦氏

十七代頤字中孚初任貴水尉棄官嗣教性至孝母疾
經月不解帶每謂人曰人不忠孝而欲學道希仙是舍
舟楫而涉大川也吾未見其能濟矣年八十有七配饒
氏

十八代士元字仲良瘠而多髯居應天山者垂四十年
山多虎人莫敢謁三元日則下山傳錄或見於大風雨
中乘黑虎往來諸峯間今山南有丹舍山北有黑龍井
碧蓮池皆其遺跡配龐氏

十九代修字德真性淳樸躬耕於野以疾告者篆木葉治之皆愈年八十五配鄭氏

二十代諱字子堅唐會昌中武宗召見賜傳籙壇額曰真仙觀將命官辭歸咸通中懿宗命建金籙大醮賜金帛還山一日大醉而化年一百餘配劉氏

二十一代秉一字溫甫母夢神人履金龜下降覺而有娠十五月而生既長目光如電夜能視物嘗負劍行山澤間叱一老樹雷即震裂擊斃二巨蟒小蛇百餘年九十二將終曰吾去矣須地震乃殮至七日果震殮時體溫如玉配楊氏

二十二代善字元長幼不如萱稍長徧遊名山三十餘年而還淵默內修不與物接年八十七配曾氏

二十三代季文字仲珪嘗與陳圖南穆伯長輩講貫道妙悉究元旨當五代之季受經錄者可免兵災乞求甚衆乃鑄鐵環券數萬繼之宋初鐵券錄尤盛年八十七配陳氏

二十四代正隨字寶神性質直宋真宗召至闕賜號真靜先生爲立授籙院年八十七配魏氏

二十五代乾曜字元光宋神宗召問冲舉之事對曰此非可以輔政教也陛下苟能還淳返樸行以簡易則天

音序
下和平矣奚事冲舉哉帝嘉之賜號隱素先生請蠲賦
役詔從之帝問有幾子對曰長子傳道次業儒遂以次
子見素爲將作主簿見素字叔晦官至衛尉寺丞歸隱
鄱陽之東湖至今子孫家焉乾曜年八十五葬仁福鄉
梓埭曹家源配倪氏

陸放翁筆記信州龍虎山漢天師張道陵後世襲
虛靜先生號蠲賦役自二十五世孫乾曜始時天
聖八年也今黃冠輩謂始於三十二代謂三十二
代爲張虛靜亦非也

按舊世家二十五代及虛靖傳俱不載蠲賦役

事放翁謂在天聖八年其爲二十五代無疑世家脫漏據以增入至謂虛靖爲世襲之號是係傳聞之誤

二十六代嗣宗字榮祖乾曜長子生而左手有印文及嗣教神異具著仁宗召赴闕祈禱有應年七十八貌若童子賜號虛白先生至八十一而化配蔣氏葬醺口寨子五人象中執中在英聲大芳大芳次子憲武舉絕倫科狀元歷官淮東馬步將軍副總管建炎四年戰歿於餘干追贈武功大夫中興名將也

二十七代象中字拱辰嗣宗長子三月能行五月能言

七歲召赴闕問道大稱旨賜紫衣命嗣教後結廬於徵君山之梧竹塘得道冲舉有七星墩白鶴塢存焉配金氏子三人敦復敦信敦直

二十八代敦復字延之象中長子象中冲舉弟執中掌印劍既而歸之敦復學識天成聲如洪鐘士林仰之年五十三葬鄧家塢熙寧中賜號葆光先生配陳氏

按賜號制詞曰惜遽返於丹邱遂莫前於宣室是敦復未嘗赴闕而先生之號乃追贈也舊世家云神宗召赴闕命醮於內殿賜號葆光先生其誤明矣

二十九代景端字子仁象中之孫敦復從子也敦復無子嗣教性恬淡絕嗜欲年三十三配游氏大觀二年贈葆真先生

三十代繼先字嘉聞一字道正號翛然子象中之曾孫祖敦信父處仁臨川知縣真君於元祐七年生於蒙谷庵五歲不言一日聞雞鳴忽失笑賦詩曰靈雞有五德冠距不離身五更大張口喚醒夢中人翌日宴坐碧蓮花上人始異之景端無子以真君爲嗣九歲嗣教稍長明習道法崇寧三年應詔赴闕徽宗問曰卿居龍虎山曾見龍虎否對曰居山虎則常見今日方覩龍顏令作

符帝笑曰靈從何來對曰神之所寓靈自從之問修丹之術對曰此野人事也非人主所宜嗜陛下清靜無爲同符堯舜足矣帝悅澠州鹽池水溢詔治之書鐵符投池中怒霆磔蛟死鹽課復常帝問用何將治蛟孽還可見否對曰臣所役者關壯穆當召至即握劍立殿左帝驚擲崇寧錢與之曰以此封汝世因祀關聖爲崇寧真君五月召見賜坐問道法同異對曰道本無爲而無不爲道體也法用也體用一原本無同異若一者不立二者強名何同異之有帝深然之因進天心盪亮諸雷法帝親祀之一日御天祥殿從容問時政對曰元祐諸臣

負天下重望乞聖度優容帝悚然曰朕何所不容對曰
陛下宏建皇極無偏無黨以蒼生爲念天下幸甚七月
建壇傳授經籙乞還山命近臣禮餞於國門四年復召
建醮內廷密奏赤馬紅羊之兆請修德賜號虛靖先生
賜金鑄老子及祖天師像遷建上清觀改爲上清正一
宮復立靖通庵翛然亭以爲修鍊之所建靈寶雲錦真
懿三觀改祖天師祠爲演法觀父兄皆賜爵有差還山
四方從學者恆數十百人大觀元年復召赴闕與道士
徐神翁同館神翁曰世事悠悠不如歸休真君曰歸則
便歸何思何慮神翁遂坐而逝宮中若有妖帝命祛之

對曰臣聞邪不干正妖不勝德陛下修德妖必自息已而仁濟亭果有妖憑一少年真君叱之少年甦而妖絕京師疫書符投大甕貯水以飲疫者皆愈歲大旱命禱之雨三日帝遣使問道要作大道歌以進授太虛大夫不拜御製詩以賜二年還山賜金帛辭曰臣一野褐耳得無以用久之自江湘入蜀遂自秦還山築渾淪庵於西仙源與石自方輩講道其中盱江王文卿同以道術顯於朝既還相與往來酬倡一日忽題脩然亭壁曰赤帝御龍行未伏姮娥分月入深山人莫測其意迨靖康之變其言始驗政和閒復召以疾辭靖康丙午金人入

汴欽宗與太上皇思真君預奏之言遣使亟召至泗州
天慶觀作頌而逝而京師亦以是日陷矣武功大夫張
憲率士民葬於龜山之下真君博學喜屬文作詩不尚
修飾所著語錄詩文若干卷徽宗時林靈素方貴幸以
書招真君真君答書曰瓢笠無情雲烟奚取金門紅霧
漫爲天上之遊白石清泉方保山中之適萍梗偶成於
會合雲泥各致其逍遙一隔江山屢移寒暑閑名日起
浪迹時睽某惟道本自然神非別有明月周流碧漢光
本無形白雲來去青山色非有跡蠶入覩而蛾去雀赴
水而蛤生變化斯須循環影響趨向不干於模擬浮沈

自得於方圓萬象有殺有生春花秋落一氣互消互息
夜露朝晞五湖放浪於扁舟三島翱翔於元鶴升高須
遠就下無難不昧先機方爲達者遠承梅驛逕復華箋
幸閔冲和適符欵記謝不與通已而靈素果敗太學生
陳東以終身問真君曰勉爲忠臣當垂名不朽也高宗
南渡東上言乞罷黃潛善汪伯彥竟被殺人服真君之
知人雅善書法嘗書道德經以進御一日侍徽宗入寢
殿宮嬪競以扇求書真君以經語書之皆密契其意中
舉一握稽首書曰保鎮國祚與天長存乃帝所御也奉
勅書茅山宣和御製化導碑時稱其工真君化後十六

年西河薩守堅遇於青城峽口授書一緘履一隻令達
嗣天師嗣天師得書大驚令人啓泗州寔惟一履存焉
後亦有遇於武夷羅浮者

三十一代時修字朝英象中之孫敦直之子也盧靖不
娶無子有弟淵宗爲道士欲令嗣教後泗州臨化時以
印劍付時修衆遂推以嗣教辭曰繼先吾從子也吾烏
得後之衆曰法統所在孰得而奸從之平居靜退年六
十一配吳氏

盧靖語錄謝官職表略云時崇教範無閒顓蒙
義重天倫推及臣子雖緣故例實駭當時則是

音序
真君有子矣與世家不合又傳天師與弟青詞
曰昔三天之後父往而子來今諸籙之師兄辭
而弟受是嘗令淵宗嗣教矣今三十一代爲虎
靖從叔豈淵宗已先虛靖卒故時修不獲已而
嗣教邪舊無明文闕疑備考

三十二代守真字遵一時修子母娠十九月而生宋紹
興十年嗣教毗陵有妖憑樹詔治之一夜風雷拔其樹
復定江濤沖決高宗召見賜號正應先生孝宗時賜象
簡寶劍清靜陰符二經淳熙三年卒配崔氏葬演法觀
西子五人景淵伯瑀伯珣伯琥嗣先

三十三代景淵字德瑩初名伯璟宋高宗賜改今名皇子魏王鎮明州有疾咒水飲之而愈既復遣人致聘使及門隱几而化配周氏葬上清菖家源

三十四代慶先字紹祖未生時父景淵鞠幼弟嗣先以爲子景淵卒弟伯瑀攝教事既而歸之嗣先

中入

覲景憲太子書樵隱二字以賜攝教凡十一年以慶先既長復歸印劍遂以嘉泰辛酉嗣教性慈儉好周貧困飲酒數斗不醉嘗遊張公洞戲以木葉投井俄而井湧波濤有老人從井出拜戒以毋作旱潦至今祈禱於井立應嘉定二年宴坐而化配周氏

三十五代可大字子賢伯瑀之孫也初景淵歿伯瑀攝
教事慶先歿子成大幼可大父天麟攝教事寧宗賜號
仁靜先生未幾成大夭以可大爲慶先後紹定三年年
十二嗣教端平間累召赴闕賜鉞經資都陽水溢錢塘
潮決詔投符治之水皆立退又以旱蝗命醮於太乙宮
雨作而蝗殪嘉禧三年賜號觀妙先生配倪氏葬瑞慶
觀子二宗漢宗演宗漢字聖傳號敬齋好詩酒不樂應
酬遂讓天師位於宗演

三十六代宗演字世傳號簡齋咸淳間上饒旱守臣唐
震請祈雨立應元至元十三年世祖已平江南遣使優

詔召之至則命廷臣郊勞待以客禮及見謂曰昔歲已
未朕次鄂渚嘗令王一清往訊鄉父鄉父使報朕曰後
二十年當混一神仙之言驗矣因命坐錫宴特賜玉芙蓉
冠組金無縫服封真人命主領江南道教仍賜銀印
得自給牒度人爲道士路設道錄司州設道正司縣設
威儀司皆屬焉復宮觀賦役即京師勅崇真萬壽宮勅
弟子張畱孫主之十八年二十五年再入覲世祖嘗命
取其祖天師所傳玉印寶劍觀之語侍臣曰朝代更易
不知凡幾而天師印劍傳子若孫尚至今日果有神明
之相乎嗟嘆久之至元辛卯卒葬芋荷源配周氏葬蟹

田源

三十七代與棣字國華號希微子洞明三教爲詩文立
成甫冠侍父入覲儀表溫瑩敏於應對世祖歎異至元
辛卯襲爵應召赴闕賜坐慰勞甚至成宗立復召命醮
於萬歲山又醮長春宮合南北道士一千人禮成封祖
宗以序仍賜寶冠金服玉圭命天下行其醮典改諸路
天慶觀爲元妙觀賞賚優渥人榮其遇歎曰吾世味素
薄今畱京師且久非吾願也乞歸未允遂示化於崇真
宮遣使護柩還山仍勅廷臣祖祭於都門葬玉田配馮
氏

三十八代與材字國梁號廣微子宗演次子至元三十一年襲爵明年改元元貞入見大明殿俾自給牒度道士免宮觀差役護法籙大德二年奉詔治海潮於杭州五年入覲丞相答剌罕請禱雨答曰誠可格天天必有感明日果雨冬無雪成宗命建壇禱之是夜雨雪盈尺成宗大喜賜酒曰卿能感神明一至此邪六年辭歸授銀印視二品勅百官飲餞之使禱所過名山宮觀是歲夏多雨宰臣合散畱守大都遣使請禱三日而霖八年授正一教主主領三山符籙九年崇明州海隄崩俾弟子持符往治民夢有神填海者遂安武宗即位特授金

紫光祿大夫封畱國公錫金印仁宗即位召見嘉禧殿
賜寶冠組織文金之服延祐三年卒葬金谿之鳴陽元
都觀配易氏公天資仁厚四方以水旱妖癘來告者無
虛日爲祈禳祛治無倦志捐粟爲義倉以周貧乏藝術
之士造門請謁各如望而後遣爲詩文千言立就作大
字有法草書亦精竒尤善画龍二子嗣成嗣德皆善画
嗣德画墨竹禽鳥嗣成所画廬山圖爲當時所稱而画
龍尤得家法

附元史本傳大德二年潮齧鹽官海鹽兩州爲患
特甚與材以術治之一夕大雷電以震明日見有

物魚首龜形者磔於水裔潮患遂息

陶宗儀輟耕錄載宋季城信州掘土處爲濠百畝
許在郡南曰南池池之傍可居舊爲里人屋歸附
後達魯花赤滅徹據有其地每春夏之交群鼃聒
耳寢食不安會三十八代天師張廣微與材朝京
回因以告天師朱書符篆新瓦上使人投池中戒
之曰汝鼃毋再喧自是至今寂然

王穉登丹青志曰張與材善画龍變化不測了無
粉本求者鱗集晚年修道嬾於舉筆人有絹素輒
呼曰画龍來頃之忽一龍飛上絹素即成画矣

夏文彥圖繪寶鑑天師張羽材字國梁號薇山別號廣微子封畱國公居信州龍虎山畫竹與龍

按羽材應是與材之誤薇山之號世家不載附以備考

三十九代嗣成字次望號太元子至大中在杭州宗陽宮遇城中火發亟登通江橋以水嚙火起處火隨滅延祐三年襲爵仁宗召見喜曰克肖而父命建醮於長春宮禮成賜冠服四年授大真人英宗即位見於上都泰定二年復建醮於長春宮有天花雲鶴之瑞國子司業虞集承詔記其事加正一教主知集賢院道教事先是

鹽官州海潮大作詔治之至是復作詔醮於浙江行省
之佑聖宮有三足龜見殿上而潮退先後在京旱祈雨
潦祈霽冬祈雪無不立應至元三年加知集賢院事順
帝曰朕煩天師多矣可錄前後勲績備載制詞既而還
山棄絕人事逍遙自娛至正四年將遊五嶽先登太山
次呂梁有老人求見密語明日遽命返舟抵寶應卒弟
子奉柩還抵雲錦溪有黑龍護舟疾行不六日溯流而
達葬南山配胡氏
四十代嗣德號太乙別號青藜散人與材第二子性寬
厚好以琴碁詩酒自娛處姻戚如春風冬日至正甲申

襲爵時天下兵爭命弟子舒惟寅募義保障盜賊不敢
犯境壬辰卒葬排衙石配呂氏

四十一代正言字仲詢號東華子嗣德長子貌古神清
沈靜寡言至正壬辰襲爵時京師不通且二年餘矣浙
江行省遣間使傳制授爵既拜命集諸弟子謂曰吾家
世代以福國忠君佑民爲本今天下兵爭日久朝廷去
遠安危未可知况吾弟子總元教於北者榮遇特隆可
無一介以報君命乎弟子程天翼請行介元教大宗師
于有興陳於朝順帝曰天師方外士也曩以川塗梗塞
無以致撫安之道朕甚慊焉使來宜護遣之天翼還報

不後期己亥中元日真人升座演道語若有警者未幾示微疾卒配夏氏

四十二代正常字仲紀號冲虛子嗣成長子父夢神人飛空而至曰余自華蓋山來遊君家願見容也覺而真人生幼穎特目光燭人父竒愛之指相傳印劍曰龍星再集於亥吾兒當持此大振元風至正己亥襲教其言果驗時天下大亂經錄久祕真人開演元旨四方奉贄來受學者雲集川赴劍失其一流落鄱陽李氏夜生光怪訪而合之辛丑明太祖取江西遣使者上述臣順之意乙巳朝京師太祖一見大悅曰瞳樞電轉法貌昂然

真漢天師苗裔也下詔褒美之丙午復入覲求符者日以千百計侍史不暇給閉關拒之不能止乃篆巨符投朝天宮井中人爭汲之須臾水竭土見猶弗已太祖爲立亭井上號太乙泉還山命給驛券往來以爲常洪武元年入賀錫宴便殿授正一教主嗣漢天師大真人領道教事給銀印視正二品設僚佐曰贊教曰掌書太祖曰卿乃祖天師有功於國所以家世與孔子並傳以迄於今卿宜體之以清靜無爲輔予至治則予汝嘉賜白金十五鎰新其第更天師號給大真人印二年入朝太祖將通誠於上帝御袞冕服親署名於章授真人祝而

焚之禮成宴於文樓庚戌錄功勲賜父母時母胡元君
年八十朝野以爲榮是年秋復召問鬼神情狀給掌天
下道教銀印五年召赴闕六年還山命畱弟子以司祕
祝之事九年秋遣使召而真人先期至太祖喜曰卿來
何與朕意相符邪明年秋朕將遣使祀海嶽諸神卿當
妙選清修之士與偕來十年率弟子入覲賜宴於午門
之城樓太祖舉爵曰卿宜盡此一觴賜御製歷代天師
贊命代祀嵩山遣重臣與真人弟子代祀羣望既還宴
賞如初歸山後慨然歎曰五岳名山先子欲遊而弗遂
嵩山中嶽乃吾祖得太清丹經之所今幸一至焉咽曦

景於層霄邈浮埃於浩劫吾志將有在矣未幾示微疾以手作一圓象默然而化年四十三是夕大崖石崩聲聞數十里訃聞太祖親製文以祭葬南山刺坑口配包氏

附墓誌公幼警敏靈籙祕文之屬皆不習而通歲屢旱禹步召風雷精明達於冥濲甘霖即降或有爲魑魅所憑者授以片符輒潛影不見公憫兵戈疫癘之餘沴氣不濟舉行元壇舊典修壇墠建陰陽鼎而鍊度之其徵驗尤夥然其天性夷簡潔而不緇如超萬物之外故以冲虛子自號最愛佳山

水仙踪靈迹所在必訪窮極深窈至累日而返當
適意時欲乘白雀與群仙翱翔紫清之上其於人
間事未嘗因此少輒其奉太元君備極孝養既歿
喪祭咸盡禮度兵禍相仍傾貲募人爲兵以捍禦
鄉井人賴以安

宋濂撰

四十三代字初字子璿號耆山目秀雙瞳面交二斗洪
武十三年襲爵十六年建玉籙大齋於紫金山十八年
禱雨於神樂觀二十三年奉勅重建大上清宮二十四
年詔禁偽造符籙者賜正一元壇印關防符籙還構峴
泉精舍於黃筍峰下爲終焉之計成祖永樂元年陪祀

音序山志
卷二
天壇賜緡錢葺大上清宮四年命編修道教書五年建
醮朝天宮有慶雲覆壇鸞雀交舞之瑞賜勅嘉獎六年
命訪真仙張三丰遇於武當山之遇真橋勅建遇真觀
八年春以印劔付弟宇清而作頌曰一點靈明本無生
滅五十年中非圓非缺今朝裂破大虛空三界十方俱
透徹舉手向前指而逝葬峴泉配孔氏所著龍虎山志
十卷峴泉集二十卷行於世

錢謙益歷朝詩選載張真人宇初字子璿嗣漢四
十二代天師正常之冢子也五歲讀書十行並下
嘗侍父登樓見雲霧起西北金扉洞開天神護衛

鎧伏森列父戒之曰天機勿洩也洪武十年方髫
丱襲掌道教入見奉天殿上熟視笑曰瞳樞電轉
絕類乃父蓋歷代相傳以眼圓而鉅者爲元應也
永樂八年示疾書頌而逝宋文憲公稱宇初穎悟
有文學人稱爲列仙之儒王紳仲縉序其集曰公
於琅函祕笈金科玉訣之文博覽該貫六經子史
百家之書大肆其窮索篇章翰墨各極精妙蓋江
左文宗多吳文正公虞文靖公之遺緒而公能克
軼之也今所傳峴泉文集二十卷詩居其半五言
古詩意匠深秀有三謝韋柳之遺響其文如元問

諸篇極論陰符上經之理而參合於儒家其所造詣可謂卓然矣

劉璋皇明書畫史天師張宇初字信甫號無爲子能詩工書翰寫墨竹自成一家亦精蘭蕙

按世家及陶宗儀畫史會要錢謙益歷朝詩選朱彝尊明詩綜俱載字子璿信甫之字獨見於此錄以備考

四十四代字清字彥璣別號西壁正常次子父夢壁魯真人幾冠朱衣入其室而生永樂八年襲爵十一年賜太嶽太和三山圓光圖命選道士爲武當山住持十四年

勅修大上清宮十五年命分獻西鎮壇前後凡九命建醮屢邀冠服圭珮金錢幣帛之賜仁宗賜金玉法印宣德元年中秋集家人飲極歡酒闌作頌忽迅雷大作有虹隨現光滿山谷而化訃聞遣中官諭祭勅葬北真觀之右山配孫氏真人七歲能詩及長博通儒經子史與兄無爲真人相倡和爲詩文得其指授所著西壁文集若干卷兄弟俱工書翰真人尤善作山水無爲真人嘗畫秋林平遠圖以詫真人曰此圖殆不減吾弟邱壑也終身怡怡人羨以爲難

四十五代懋丞字文開號澹然又號九陽正常第三子

宇珵之子也洪武時父宇珵隨兄宇初入覲詔娶誠意伯劉基從女真人劉出也洪武丙寅臘日父宇珵宴坐中庭突有遁者衣貌奇古自稱重陽子遺以菊花一本曰願假館門下六十年語畢不見明年九月九日真人生有紫雲覆屋三日乃散四歲效作禹步有雷聲隱隱人異之再作則大震及授儒書日記萬言文章書畫卓冠時彥嘗經山澤間有垂木前障從者請從間道真人曰正人不由邪徑俄而烈風大作至則樹已拔矣杭州大疫書巨符投井飲者立愈遊華蓋山祥光屢現天燈夜如星布其神異感格多類此宣德元年襲爵入覲賜

宴便殿二年賜冠服劍珮五年賜尚方八寶金幣八年
賜冠劍衣舄九年給部牒度道士賜御製招隱歌英宗
正統元年勅建天師府於朝天宮東北隅給以廩餼二
年賜宴奉天殿又召與衍聖公同宴各賜金幣衣履六
年又給部牒度道士七年賜宴文華殿前後命陪祀太
廟者二分獻諸壇者七建醮宮觀者十一傳延禧籙者
二年五十九卒果符假館之數葬馬鞍山配孫氏繼董
氏

附書畫譜天師張澹然號九歸道人山水宗二米
布景清雅亦能作枯木竹石

按澹然真人無九歸道人之號書畫譜又有天師張子言號靜淵善畫山礬水仙墨梅世家並無此名字附錄備考

四十六代元吉字孟陽懋丞之孫畱綱之子也母夢長庚星如虹下流化爲白鳳集於懷而娠幼明敏於祖祕儒書一覽輒了喜爲詩然所發皆非塵世語父早卒正統十年年十一襲祖爵明年召見賜宴仁智殿命書趙天君符恍惚有神虎哮吼之聲英宗嘉歎貶贈父母又念其幼孤勅禁族屬侵侮更授贊教堂書等官輔之戊辰召對稱旨賜萃寶冠金文服己巳雷擊謹身殿鵠吻

雨浹旬不止召問以慎起居戒邊防爲對命祈晴檄召
雷神有巨鷹藍距赤翅扶大風而吸攫檄排雲去觀者
駭然應時晴霽上喜愕交至賜賚有加景帝召問諸雷
祕法大悅曰神明之後代不乏人可謂善繼矣英宗復
辟登寶座輒有影響命劾之有異鳥斃於壇祠之下又
御奉天殿聞空中如木石墜壓之聲命禳謝其聲遂絕
晚歲徧遊諸名山歸而結茅龍虎岩下卒葬簞箕灣配
吳氏

四十七代元慶字天錫號貞一又號七一丈人博學能
文長於書画成化戊戌襲爵乙巳命降香大華蓋山及

鐵柱宮弘治庚戌命祈聖嗣明年皇太子生賜玉帶金冠蟒衣前後建醮祈禱賜予優渥己未還山舟次沽頭聞旱淺不前有司請禱書鐵符投白象潭薄暮雲蒸雨注遂利涉焉辛酉乞致仕許之壬戌命祀天目葛仙華蓋武當霍鳴五山乙丑賜書褒問又命祀武當霍鳴葛仙三山至霍鳴邂逅一鵝衣霍貌老翁迎揖之作而笑曰來去不聞山鳥喧三生石上龍蛇年即拂袖緣崖去真人悵然返旆己巳秋九月張筵會客縱飲極歡酒竟北向盤坐於元壇之西再誦老翁言而逝葬金溪長生觀配朱氏

四十八代彥頤字士瞻號湛然弘治辛酉襲爵歸而求學不輒元祕既通涉臘墳典事親篤孝武宗召問曰卿之祖非神仙乎朕聞神仙長在今還可見亦可學否對曰臣聞君之愈於神仙者堯舜是也至今猶存願陛下慕而效之則聖壽可等天地矣乃若臣類爲神仙者不足尚也庚辰車駕南巡詔命磔牛首山後湖二妖世宗即位賜問以清心寡欲爲對戊戌詔建醮齊雲山祈聖嗣己亥奏乞以齊雲山如太和山例除道士爲住持賜名元天太素宮免徵所餘香錢是年嗣子生賜洗兒湯餅金併兩詔免朝撫視其子己酉携子入覲舟次錢塘

沙淤江涘民病涉投以符即盪去次徐州水涸舟膠戲
作詩投之有句云願借紅袍三尺水官航穩載上京畿
水忽夜溢至都乞致仕庚戌夢遊岱宗遂卒卹典詔從
侯爵葬弋陽縣城東故疊山書院配李氏繼配吳氏柳
氏

四十九代永緒字允承號三陽父夢甲胄之士來謁自
稱三陽將軍刺書九字者三而了無名姓忽大風飄去
而寤翌日真人生少通元典間學擊劍出則佩劍巡行
山澤中入則杜門謝絕賓客嘉靖己酉襲爵壬子給伯
爵乙丑元旦賜宴班在太學士徐階上還山舟次嚴陵

瀨推蓬四顧夕陽在山扣舷而歌曰九九歸時候家
隔數峯青還在無何有鼎湖將墜火龍髯我今先跨金
牛走少閒又歌曰暗來回首不須悲雞鳴日出還依舊
遂卒俄而世宗晏駕真人葬獅子山南極觀配徐氏
五十代國祥字心湛祖彥玳父永紹永緒子天佑早夭
遂以國祥爲嗣萬曆丁丑襲爵畱京邸十三年纂修道
藏旱則祈雨冬則祈雪咸有靈應疊膺劍珮冠服之賜
乾清坤寧兩宮成命醮后土賜隆宗門外直房神宗問
曰聖人以神道設教卿教非神道乎對曰聖人治天下
靜默思道恭己正南面而已故神其道而天下化三代

而下一日萬幾非勵精不能圖治臣之教以利濟為本
亦能福國佑民若治天下尤在克艱無逸非清靜無為
之謂也時神宗方倦勤真人蓋因問以諷也還山路出
繹縣湖凍塞道符檄湖神冰即泮繹令鐫碑以紀異先
是四十二代真人輯祖宗言行為世家一卷金華宋文
憲為之序真人續輯至四十九代以揚先烈又輯龍虎
山志三卷已酉貴溪大水上游宮殿宇悉傾圮入告賜
銀修建功未竟而卒贈太子少保葬金溪明陽橋配謝
氏

五十一代顯庸字九功初名顯祖神宗賜改今名幼時

誤墮井中衆莫之知明旦汲水者以告始得出井極深
廣衣冠絕無濡濕濡足而已人驚異以爲神佑天啓丙
寅襲爵故事大真人承襲不待終喪真人懇請守制服
闋後始拜命以大上清宮工程未竟恐父志隕墜日夜
庀材鳩工越二年告成真人好讀書晚尤精進每教弟
子曰爲學猶掘井井愈深土愈難出若不堅心力行豈
得見泉源乎其言有合於儒者年未及艾即謝掌教事
自號浴梧散人結浴梧會日與諸弟子究先天太極及
心性之學著三教同塗論金丹辨惑浴梧詩集凡若干
卷懷宗加太子少保年八十一配陳氏

五十二代應京字翊宸崇禎丙子襲爵庚辰皇子病疹
命祈禳懷宗親詣祖壇行禮祖壇者故祀祖天師處也
懷宗將下拜應京曰臣祖天師臣道陵位在人臣禮不
當拜懷宗曰卿祖天師道德高深正賴默贊元化可晉
封六合無窮高明大帝卒成禮還皇子病旋瘳賞賚優
渥甲申三月懷宗殉國既而隆武僭號於隆平貴溪與
閩接壤鄰近盜賊蠭起蟻聚安仁妖僧某煽衆焚掠及
上清真人募鄉勇禦之不克登老雷壇嶺檄召神將俄
而陰雲四塞遙見一神驅黑虎逐賊賊衆奔潰邑里以
寧

皇朝定鼎貝勒固山略地江西副總兵王德仁疑真人走
福建從隆武潛兵將屠上清未至二十里真人迎謁道
左德仁詫曰君猶在此耶何緣預知我來至真人府父
清素真人攜杖出迎蒼顏霍髮翩翩有凌雲之氣德仁
遂下拜稱弟子順治八年入覲

世祖

章皇帝授正一嗣教大真人掌天下道教事禮秩咸如
故還抵揚州瓊花觀卒葬南山康熙庚戌遷窆溪田源
承益藩郡主

五十三代洪任字漢基少訪道於混成院何海曙博通
祕笈順治八年襲爵十二年

音序
卷六
世祖章皇帝駕幸南海子召見奏對稱

旨勅免本戶及上清宮各色徭役外藩有妖邪爲害聞於朝
世祖章皇帝命真人驅除先後遣法員高惟泰楊幼芬出塞
治之立應諸部落感激

皇恩且崇信真人道法至今不衰康熙六年卒葬金谿米坊
三十六年恭遇

覃恩 誥贈光祿大夫配顧氏

誥封一品夫人

五十四代繼宗字善述

聖祖仁皇帝賜御書碧城遂以爲號真人生八月而父洪任

捐館叔洪偕攝大真人事真人与生母楊夫人竢獨依
倚幾不免凍餒既遭耿逆之亂里中無賴子乘機焚劫
母子流離奔避瀕死者數康熙十八年襲爵而廬舍焚
燬田土荒蕪真人少歷艱苦澹泊一如寒素生母楊夫
人尤節儉能治家拮据數年始稍葺府第以居入覲京
師有覬奪大真人印者

聖祖仁皇帝命分壇禱雨繼宗奏應於某日得雨既而雨果
應而覬印者之言不讎

聖祖仁皇帝嘉歎

命隨覲法員吳士行等三人畱京供事三年一易在京日給

廩餼往返給驛馬既復加增二員爲定例還山

御書大上清宮額以賜三十三年

命進香五嶽道出開封長吏以苦旱疫癘請禱不旬日雨澍而疫已河水決開歸界日齧岍數十丈吏民惶懼走請投以鐵符岍復故過龍陽有妖神號五羊者爲祟焚其祠既有白足鼈無算死溪中而妖絕過蘓州收赤猴鐵鎖二怪三十五年復

命賜乾坤玉劍三十六年

覃恩誥授光祿大夫妻牟氏封一品夫人四十六年

賜第京師五十二年

賜帑銀修龍虎山殿宇五十四年冬將入覲至揚州瓊花觀矍然曰此先祖蟬蛻處也余亦從此逝矣示微疾卒年五十九葬篠嶺背之南山

五十五代錫麟字仁趾康熙五十五年襲爵有四弟俱幼朝夕勗以向學分甘同苦室無閒言

世宗憲皇帝御極

覃恩例授光祿大夫妻一品夫人時尚未請封雍正五年例應入覲命法員婁近垣偕行至杭州病亟囑近垣曰吾無以報

國家厚恩子忠誠篤實其體予志以善事

天子近垣既受命越日真人卒遺疏以子遇隆幼請以弟
慶麟署大真人事得

俞旨八年

世宗憲皇帝命近垣禮斗有靈應

聖躬悅豫賜近垣四品龍虎山提點司欽安殿住持發庫帑

銀

命大臣修建大上清宮九年三月

命錫麟第三弟昭麟署大真人印協同監修龍虎山廟宇復

賜昭麟銀幣

殊恩異數曠世希有近垣之遭際寵光皆錫麟培植有素

也

龍虎山志

卷六 世家

三

龍虎山志卷七

妙正真人婁近垣三臣重輯 徒惠遠謨虛中校

人物

司馬遷立孔子世家而復作仲尼弟子列傳聖人之教所被廣矣天師爲道教之宗而龍虎山其洙泗也學道者代不乏英膏俊傑之士其事跡例應得書然人非習其教者不敢援引故趙子昂揭曼碩雖俱爲上清宮提點不以宮觀兼銜混儒於道而陸象山夏桂洲之居是邦生斯土者又無論已惟載羽流用稽法派志人物

漢

王長

王長祖天師弟子通黃老習天文從天師最早同居龍虎山鍊大丹負書行歌不交人事既而偕至嵩山西蜀凡天師所遊歷長未嘗不侍天師告諸弟子曰爾等俗態未除其九鼎之要惟付王長也後與趙昇同昇太乙天中九徵志云王趙二真人理第六十九福地廬山

趙昇

附李忠

趙昇謁祖天師學道歷七試而得傳祕要事詳葛洪神傳見世家後與王長隨天師同日上昇宋林靈素於西

洛遇道士自言姓趙授以神霄天壇玉書書中有神仙變化并興雲致雨符咒祛遣百鬼役使萬靈等法次年復遇於岳陽酒肆云吾漢天師弟子趙昇也又李忠者蜀人亦祖天師弟子今上清宮是其始叔建云

唐

劉遷

劉遷豫章大賈也素好道受正一籙奉行甚謹客金陵暴死既而復蘇言爲陰司所攝道逢仙吏曰世人受籙不能持戒汝佩奉至誠死期雖至可復延二紀遂入龍虎山爲道士後無疾而終

按舊志遷係宋人今此曰唐不知何據同考

龍虎山志

卷七 人物

二

宋

王道堅

王道堅貴溪人本宮道士學於虛靖真君政和間赴召館於太乙宮徽宗問以輕舉延年之術對曰清靜無爲黃帝所以致治多欲求仙漢武所以罔功修煉非天子事也授太素大夫號凝妙感通法師時徽宗預知國當有厄命禳之對曰修德可以回天禳禳之事不敢誤國力請還山紹興初高宗復召先一日鳴鼓集衆而舉頌曰無心曾出岫倦翼早知還爲報長安使休尋海上山比使至已化矣

石自方

石自方字元規鄱陽人虛靖真君弟子也虛靖常語以死生之變自方曰吾得全於天不知好生不知惡死柰何得以死哉虛靖曰不然爾謂得全於天天復得全於何真宰不明性識交熾一真獨露萬幻皆空則天亦無所全自方由是有省住渾淪菴有與虛靖聯句見藝文

祝永祐

祝永祐貴溪人本宮道士與王道堅齊名政和間賜號冲應大師知神霄宮事時浙東盜起將及信境郡守請檄神兵備禦永祐曰無庸盜踰常山當自還頃之盜至

草坪大風晝晦若有旗旛戈戟出沒山谷間乃宵遁郡守以聞加號通妙後復召歎曰太素公且將歸矣吾何往爲稱疾不赴

王襲明

王襲明貴溪人紫微院道士精於修煉得內丹之妙政和中屢召不赴授本山道正後隱去乾道間有遇之於蜀者計其年已百餘歲矣

薩守堅

薩守堅蜀西河人少有利物心嘗學醫誤以藥殺人遂棄醫聞三十代天師虛靖真君道法步往從之至峽口

囊資已罄見一道人問守堅何所徃告以故道人曰天師羽化矣守堅方悵恨道人曰今天師道法亦高吾與之有舊當爲作字可徃訪之遂授以咒棗之法曰咒一棗可取七文咒十棗得七十文則有一日資矣達信州見天師投書乃虛靖手書也嗣天師遂授以祕要由是道法大顯

李珏

李珏字雙玉崇慶州人既得黃房公金丹之道改名棲真號太虛即徃武彝潛修半載道將成乃之龍虎山先夕零壇有夢真人王者時久旱祈禱弗應次日珏至衆

音序山志
卷一
皆弗知惟夢者曰是此人也衆請祈雨應時霑沛

李德光

李德光安仁人禮虛靖真君爲師修煉于壁魯洞初崇
禧觀隨真君北覲徽宗問道稱旨勅掌河南路道教改
崇禧觀爲宮陞本宮提點兼諸宮觀事

呂惟一

呂惟一餘千人行義純篤能煉丹砂紹興間授演法觀
知觀以壽終度弟子呂保成鄭保和李保純保和授本
山知宮別初寮宇曰存正保純有文學繼授道正弟子
六人朱與賢居本宮構別室曰精思梁與可張希然居

天聖餘皆遊方不知所終

王洞章

王洞章貴溪人師王鑒義自幼警敏博涉經史工詩文
善琴奕弱冠從鑒義入朝即御前賜牒與王若時同爲
道士後勅授冲和大師若時授冲隱大師壽六十餘度
弟子蔡元久倪元簡元久居本山元簡同冲隱居衡岳

郭保寧

郭保寧號岫雲臨川人師王彥寬性端直耿介尅志道
法工詩能琴多與方外清修之士交乾道間授本宮監
宮白玉蟾贊其真曰補月手段來整福庭嚼氷肺肝蔚

音序
爲人英詩似貌偉琴似人清瞻之仰之岫雲先生度弟子五人周泰文居本山黃太和居寶婺黃泰興等皆遊湖海

薛洞真

薛洞真字遠甫貴溪人賦性閑雅寡言笑美姿致受法於王鑒義紹興間知祈真觀以符藥濟鄉邦人多感之弟子王元質薛元美李元溢乾道間授本宮副知宮築別室曰混成

徐處尚

徐處尚貴溪人精於術數嘗遊岷峨以經字言人吉凶

輒中紹興間授本山知宮事居紫微方丈西南之別室
曰迎華弟子徐元修楊元善紹興間亦授宮之道正

雷用光

雷用光字道輝貴溪人師蔡元久道貌奇古既壯遊南
嶽至臨川逢一道人自言張輔元與偕行行則爲張負
止則爲張炊次長沙張謂曰子事吾勤亦至矣向吾慢
子觀子之變乃久而加敬吾入蜀有一編書授子子其
祕之遂去啓視之乃天心五雷法書也張輔元者或謂
是漢天師云淳熙丁未衢州旱甚郡守沈作礪夜夢神
人告曰司江南風雨者雷用光也又夢黑龍蟠於城隍

廟門旦遣視之乃用光醉臥也遂強延禱雨大應作礪以聞詔趣赴朝道經婺之蘭溪嚴陵皆以雨請悉應如響至錢塘禱雨又應時年四十尚未得牒正道士之名孝宗即御前賜以冠服且御書行業清高精誠感格八字賜之前後五制授左右街都道錄太乙宮都監號冲靜先生寧宗爲出內帑錢帛修上清宫新而廣之特免差徭復爲甲乙奏立長生局許置莊田飯衆增貢舊規嘉泰甲子得請還山校定黃籙科儀開禧乙丑冬復召謂使者曰歸奏天子治天下者道德五千言足矣山林野人來將奚益明年丙寅元旦朝真畢與宮之士會拜

笑且言曰奉告珍重有問之者答曰一念倏萌是曰妄想達人觀孰來孰往遂口授遺表俾聞于朝乃陞座揮麈言曰自出洞來無敵手竟不續下句而化七日面色如生寧宗覽表爲之嗟悼遺香賻宣葬於宮後之方家源嗣其教者爲紫微派

易如剛

易如剛字仁甫安仁人道法精嚴尤工詩文嘉泰間赴召制授三茅山崇禧觀左街監義五遷至左右街都道錄太乙宮都監賜號通妙葆真先生理宗立眷遇益隆嘉定間得請還山卒

張希言

張希言字真常三十二代正應真君之孫奉祖命度爲道士充正宮監住持演法觀勅授冲妙大師江州都道正管轄洞霄宮上清宮之毓秀院其法派也

張聞詩

張聞詩號松隱貴溪人景定間勅賜觀妙大師住持本宮先是宮門不稱聞詩別牴樓門面琵琶峰前臨大溪有以陰陽之說撓之者聞詩曰自後吾教當大昌山中之盛應十倍於前也預作生墳于石陂渡得石鏡一石履二聞詩曰此豈吾徒履泰階而輝耀靈之兆歟謂張

留孫曰恐在爾也後十年宗師在朝元至元間誥封通真觀妙元應真人卒

毛允中

毛允中安仁人景定間赴召奉勅建紫微宮理宗御書宮榜臨終召諸弟子曰山中之士於世何補惟當修身慎行以報君親師耳勉之言訖而終

張道虛

張道虛東隱院道士素以道法顯咸淳中勅治錢塘鹽精制授都道錄不就賜號草亭先生

張與槎與年

張與槎張與年俱張天麟之曾孫也天麟爲三十五代
真君之本生父曾攝教事嘉定中賜號仁靜先生次子
必大子曰宗清宗清生四子而與槎與年俱入上清宮
爲道士與槎居棲真與年居養素清修雅操時稱競爽

薛應常

薛應常字無元貴溪人混成道士咸淳間赴召禱雨有
應授太乙宮都錄還山授管轄未卒前七日進表曰應
常以烟霞陋質叨冒聖恩死無所報謹奉表永訣上驚
異勅以禮葬

孔希岳

孔希岳金溪人總角從道睥睨當世時湯漢負人士重望至山中納交焉尤與白玉蟾結契凡遊覽吟詠必與之俱

張元英

張元英長沙人景定間遇異人授以道法令爲道士嘗禱雨於鄉刻期不應忽有神憑人語曰水南樟柳妖梗雨耳元英向空叱雷神火其柳霹靂一聲大雨霑霑明日有來自水南者言雷火昨焚樟柳矣於上清宮主黃籙醮一人忽自縛門柱曰適在倪洋市飲酒啖牛肉冒觸醮壇神縛我急乞師解救元英曰既知畏神神宜釋

龍虎山志 卷一
之以水喫之而醒其靈異多類此

李謹修

李謹修金溪人崇禧院道士咸淳中授明遠冲妙崇教法師掌袁州元至元初赴召授道錄左正一奉勅建繁禧觀陞高士兼領天下道教事

黃崇鼎

黃崇鼎金溪人咸淳中從三十六代天師入覲勅掌杭州路御前西太乙宮提點元至元間陞冲素大師主校文籍加冲素端靖宏教大真人兼領道教事

曹監臨

曹監臨不知何許人投三華爲道士常若痴呆自謂吾老實當作監臨人遂呼之輒應嗜狗肉人呼爲曹狗亦應嘗摘茶醉臥園榭下喚之不醒至日斜住持曰天且晚喚曹歸喫飯衆蹴之起曰我在延平人家喫齋何爲呼我未得終席人以爲妄乃出袖中生荔枝數枚人始異之後不知所終

元

李宗老

李宗老達觀院道士嗣宗師吳全節之師至元間授江東道道教都提點住持本宮御史中丞崔彥見而歎曰

使朝廷皆得若人何事不理邪旋謝宮事卒

吳元初

吳元初龍虎山高士也嘗學於臨川雷空山所著詩文有元元贅稿虞文靖公集叙之略曰元初服黃冠以自隱無所營於時故無所爭於人交遊天下名士詩文往來皆一時之盛其言溫而肆清而容雜而不厭幾於道者之爲乎

劉思敬

劉思敬廬陵人少落魄不羈嗜酒好長生術及長遊蜀中從靈寶陳君受丹砂訣行混元之法徧歷諸名山年

五十始入龍虎山爲道士自號真空子尋主郁和道院
鍊鉛汞爲丹砂服之者疾良已至元十八年世祖召對
稱旨上苦足疾進六甲飛雄丹吞之而瘳復召問曰卿
壽幾何對曰踰七十矣曰顏何童邪對曰無思無慮勿
撓其氣惟一惟純以守其真上悅賜葡萄酒飲之每賜
輒醉醉輒仆地而臥上嘗以真神仙稱之居八年乞還
山賜以銅簡鐵笛及百衲袍之屬結八卦菴於琵琶峰
右月夜徃徃出坐磐石上持鐵笛吹之依稀鸞鳳鳴二
十八年八月呼陳鍊師與之劇飲曰我明日將死故與
子醉別明日扣門無應者力排而入已側臥而逝矣至

正間贈疑妙靈應真人

張雷孫

張開府雷孫字師漢貴溪人少從伯祖聞詩學道於達觀院既長修顙廣顙狀貌奇古有道人相之曰神仙宰相也至元十三年從天師張宗演入朝世祖與語稱旨遂雷侍闕下世祖嘗親祀幄殿皇太子侍風雨暴至衆駭懼開府禱之立止裕宗在東宮寢疾上以爲憂命開府往護視疾尋瘳駕幸日月山昭睿順聖皇后得疾危甚亟召開府祈禱既而后夢有朱衣長鬣人從甲士導朱輦白獸行草間者覺而異之以問開府對曰甲士導

輦獸者臣所佩法籙中將吏也朱衣長鬣者漢祖天師也行草間者春時也殿下之疾其及春而瘳乎后命取所祀画像以進視之果夢中所見者帝后太悅詔兩都各立上帝祠賜名崇真宮俾開府居之即命之爲天師畱孫固辭乃號之上卿命尚方鑄寶劍以賜專掌祀事十五年授元教宗師賜銀印又特任其父信州路治中尋復陞江東道同知宣慰司事是時天下大定世祖思與民休息開府因論黃老治道貴清靜聖人在宥天下之旨深契上衷及將以完澤爲相命開府筮之得同人之豫奏曰同人柔得位而應乎乾君臣之合豫利建侯

命相之事也何吉如之及拜完澤天下皆以爲賢相大
德中加號元教大宗師同知集賢院道教事且追封三
代皆魏國公官階品俱第一武宗立召見賜坐陞大真
人知集賢院位大學士上尋又加特進進講老子推明
謙讓之道及仁宗即位猶恆誦其言且諭宰臣曰累朝
舊德僅餘張上卿耳進開府儀同三司加號輔成贊化
保運元教大宗師刻玉爲元教大宗師印以賜至治元
年卒年七十四葬南山觀賜額神德宮詔圖其像命學
士趙孟頫贊之天歷元年追贈道祖神德真君

吳全節

吳宗師全節字成季號閑閑安仁人世居壽櫟山宋咸
淳己巳其家有泉出東楹之礎潤洽之脉理直如貫繩
上升梁間達於西楹乃生靈芝光彩眩目而不壞是歲
十一月七日宗師生丹光盈室生七月而能言四歲能
誦詩七歲其叔父教之日記千言十歲從其兄遊仙岩
有遺世之意十三學道於龍虎山之達觀堂臨川有雷
空山者深明易老以其學著爲成書達觀堂李君宗老
宗師之師也避舍延之而宗師遂得以專禮受其業年
十六度爲道士從天師宗演入朝以貞靜文雅受知世
祖世祖欲易其褐而簪纓之不可至元二十六年奉詔

祀南岳二十八年從張畱孫徧祀嶽瀆二十九年賜崇
真宮於浙西奉詔宣諭江浙行省三十一年成宗即位
召見賜琬玉螭螭環一勅每年侍從行幸所司給廬帳
車馬衣服廩餼著爲令元貞二年授冲素崇道元德大
法師大都崇真萬壽宮提點三年大上清正一宮災與
近侍馳驛命江浙更作之請與宮之人各以私財佐有
司之不及四年命有司作三清殿及觀門廊廡于崇真
宮設醮慶成上齋而臨幸五年召天師與材過楊州爲
守臣禱旱雨至京師爲答刺罕丞相哈喇哈孫王禱旱
又雨八年父母皆七十賜對衣尚尊爲壽九年作崇真

宮於安仁縣賜名曰萬壽崇真觀十年授江淮荆襄等處道教都提點崇文宏道元德真人鑄銀爲印曰元教嗣師之印視二品封其父克已翰林學士中順大夫至大元年賜七寶金冠織金之服仁宗在東宮所賜冠與衣貴重華異如上所賜從駕之東都中秋錫宴上顧其貂裘敝改賜黑貂三百以爲裘縷金文之錦以爲祿三年贈其祖鑑昭文館大學士封饒國公謚文靖祖妣陳氏封饒國夫人父翰林學克已加授榮祿大夫大司徒饒國公母舒氏饒國太夫人仍賜對衣尚尊命公歸鄉榮其親勅翰林學士元明善修龍虎山志成表以進改

賜崇真觀額爲崇文宮延祐元年請歸慶其父母八十
壽四年名其鄉曰榮祿鄉里曰具慶里六年饒國公訃
至上京奉勅給傳奔喪十一月太夫人歿十二月開府
張公觀化於大都有旨歸其喪于山百官送諸上東門
外請歸執喪不許命弟子真人陳日新薛元義奉喪還
至治二年授特進上卿元教大宗師崇文宏道元德廣
化真人總攝江淮荆襄等處道教知集賢院道教事元
教大宗師玉章一一品銀印一勅臺司百官諭以傳宗
之事三年大上清宮又災公率其屬更作之泰定二年
加贈饒國公光祿大夫大司徒自仁宗三年至至順二

年先後奉勅設醮於龍虎閭皂旬曲三山者各三於安
仁縣者一於長春宮者二宗師嘗代祀岳瀆還成宗問
曰卿所過郡縣有善治民者乎對曰臣所過洛陽太守
盧摯平易無爲而民以安靖成宗曰吾憶其人即日召
拜集賢學士成宗崩仁宗至自懷孟有狂士以危言訐
翰林學士閻復者事叵測全節力言於李孟孟以聞仁
宗意解復得以老去當時以爲朝廷得敬大臣體而不
以口舌傷賢者全節蓋有力焉又嘗奏正衍聖公世襲
宗法上宋儒陸九淵語錄論時宰不合聽吳澄去建議
侃侃非僅以道法顯也雅好結納士大夫推轂善類惟

青川山志 卷一
恐不盡其力至於賑貧周急不以恩怨異所著詩文曰
看雲集二十六卷揭奚斯叙以行又刪定道書類爲靈
寶玉鑑十卷晚歲作環樞堂画先天圖於壁題詩曰要
知顏子如愚處正是羲皇未畫前御書閑閑看雲四字
賜之勅改崇文宮爲龍章寶閣達觀院爲玉像寶閣命
儒臣爲之記年八十二卒葬明成觀之左山

陳日新

陳日新字又新安仁人弱不好弄靜居若思昆弟三人
既喪父伯氏以儒顯仲氏能治家以爲養其母知日新
志使從師龍虎山玩志希夷爲學日約人莫測其所至

而其所造亦莫自知也及至京師好讀書不樂接世務其居在宮中最幽迥處庭中草木無所翦治花實時成云以觀化好爲詩清麗有足傳者手校道書丹經太洞玉訣靈寶黃籙齋科皆極精詣嘗過杭杭方旱徧禱弗應行省丞相答刺罕候日新以爲請坐爲致雨杭人稱之又能論人生甲子推之以言其禍福壽夭奇中人異之日新不以爲事亦未嘗言也開府張公雷孫受知元世祖肇設道教身爲大宗師擇可以受其傳者吳宗師全節大德中爲天子禱祀名山見日新於上清正一萬壽宮回告開府遂召見深得開府心歲從車駕行幸察

音月山一
卷一
罕海有旨禱雨大應授崇真萬壽宮提點封真人兼龍
興玉隆萬壽宮又領杭州宗陽宮天曆二年四月四日
卒年五十二虞道園集與爲方外交三十年最知日新
日新沒爲之銘其墓今道園學古錄載陳真人道行碑
是也

汪集虛

汪集虛廣信人元守國大元帥紐林公之孫元帥自憲
宗時以兵取蜀有大功君少入龍虎山學道修漢天師
法持戒甚嚴飲食起居之堅苦自其徒有不能堪既而
遊青城會大旱吏民走以要集虛集虛以其法立爲致

雨大水又以要之雨立止歲以不害疫癘鬼怪之撓其民者得集虛指顧皆帖息如常集虛每出男女老幼見之者皆拜伏車下如見神人自行中書省肅政廉訪司凡官府郡縣咸信尚焉成都守陝攝度地于城中之西偏與前守共構室處之遠近之軍民商賈送竹木瓦石金幣米粟與百工操其技自獻者四面而至矣構宮廣若干畝制屋爲殿者二一祠天帝一祠漢正一天師爲堂爲圓菴及東西屋以居修真者而所居曰草堂爲屋若干間門廡庖湍庫庾悉具經始於延祐元年二月成於三年八月翰林學士虞集被旨歲祀江瀆還以其事

告吳宗師全節宗師曰此吾龍虎山中學道弟子也西
遊青城十餘年矣未幾成都守臣上其事集賢院以聞
勅賜名成都路正一宮命翰林學士虞伯生集爲記文
載伯生集中

薛元義

薛元義字元卿號上清外史貴溪人爲學宏博好古書
尤工於詩四方傳誦風日清美輒賦詩以自娛虞道園
稱其詩有飄飄然凌雲之氣延祐中制授淵德致虛輔
教真人張開府卒與陳日新奉喪還卒所著有上清集

陳義高

陳義高張開府雷孫弟子授大都崇真萬壽宮提點卒
追贈粹文中正明教真人

劉致和

劉致和字立中本儒家子爲上清宫道士築室于仙城
之下面象山作樓三間藏書萬卷顏曰本心焚香讀書
其中翛然自遠吳草廬爲之記

張嗣房

嗣房張雷孫之徒孫也恢廓慷慨剛直自立人有過輒
面折人有急周之無吝好讀書能詩建元禧觀於仙岩
之陰從雷孫入覲仁宗授體道通元淵靜法師主潭州

路岳麓宮泰定三年卒

李奕芳

李奕芳偕嗣宗師吳全節在朝大德中授明遠冲妙宏
教法師南嶽廟提點兼潭州路衡山昭聖萬壽宮壽寧
觀住持提點

夏文泳

夏文泳貴溪人達觀道士吳全節弟子也砥礪清節樹
立峻整趙文敏擬之以陶貞白侍武宗於東朝大德間
勅建元成宮以居之陞元成文正中和真人江淮荆襄
等處道教都提點賜銀印視二品領天下道教事

吳與順

吳與順紫微院道士好修勇退而樂於爲善鬼谷山凝真觀傾圯已久與順與其徒金蘭重修之又築天樂道院于觀之東滌煩亭于觀之外有鄭萬休者家故儒也聞與順名往從之爲弟子

毛穎達

毛穎達達觀院道士偕吳全節祀嶽瀆授紀素宏道冲妙法師上都崇真萬壽宮提點皇慶初加正德宏仁靜一真人與馬祖常揭曼石陳敬交三人集中各載送毛真人還龍虎山詩是也

孫景真

孫景真字德宏號文軒貴溪人崇禧院道士大德中從
天師入朝授通真凝妙宏道法師掌真元宮提點延祐
間奉勅建崇禧宮陞高士兼領道教事嘗鑄大鐘起鐘
樓施田益宮中

余彥綱

余彥綱字叔紀福建人有文學大德中作道藏室於上
清宮復買田以食其衆且備修葺

金蓬頭

金蓬頭號野庵永嘉人遊龍虎山居先天觀復構蓬萊

庵於聖井山每風月良夜露坐磐石上蛇值其前悉逶迤避去歲旱叩井召龍與語龍出聽逾時漸小躍入袖中復騰奮入水雨隨霽沛後隱武夷山人以毒藥飲之鑿地伏而吐出今名吐丹井方方壺殷破衲李西來皆其高弟也

趙元陽

趙元陽安福人初習進士業夢神語曰汝神仙中人何必求塵世利達遂棄家學道龍虎山得金蓬頭內外丹訣洪武初遍歷名山還謁冲虛天師天師禮敬之上清學者多師事焉後於雲都紫陽觀尸解去詩詞若干篇

行于世

何斯可

何斯可張嗣房之徒也嗣房建元禧觀未成而化斯可繼葺之復買田以飯衆至正中授明素通元隆道法師

汪道一

汪道一世爲龍虎山人學法于金蓬頭與人祛邪治病無不靈驗元末徃盱江歲旱禱雨穴地而坐燒松烟爲雲須臾雨大注遠近爭迎乘竹塹從歌童數十所過處雨輒隨之時以火燒瓢撫身自謂以補真陽也後結庵金船峯或數日不食或一日累食忽謂衆曰予歸矣端

坐而逝

張彥輔

張彥輔龍虎山道士從吳全節學道妙齡逸趣特精繪
事虞道園嘗見其作江南秋思圖賦詩曰石壁蒼松含
爽氣江沙翠竹弄晴暉然自矜貴人罕得之雖遊從之
久者不能強求也魯國長公主好名畫以自娛玩欲得
其画而彥輔終不肯嘗為方方壺作聖井山圖危太僕
為之序

蔣雷谷

蔣雷谷字同壽貴溪人幼遊上清宫歎曰凡骨豈能居

此即投洞觀院禮練太素爲師元教祕法悉得其傳後
遊蜀得掌心雷祕明洪武初授神樂觀知觀尋陞五音
都提點永樂初還山度弟子顏福淵吳嗣育

明

張友霖

張友霖字修文明遠院道士洪武初赴召授教門高士
尋陞提點掌大上清宮諸宮觀事

張仲毓

張仲毓龍虎山道士嗜學工詩尤善鼓琴

李仲冶

李仲治號了菴龍虎山道士聞祝直清叔陸文安公祠於其里從之遊忽覺有省一日往金溪會黃殷士講學於半山相與劇談本心之說一座盡傾咸曰此小鵝湖也

吳葆和

吳葆和明遠院道士洪武初授道錄司左至靈兼朝天宮住持

林靖樂

林靖樂字純素福建閩縣人崇禎院道士永樂初赴召授道錄司左演法加武當太嶽太和山大聖南岩宮提

點都督武當事

方從義

方從義字無隅號方壺貴溪人出家於混成院學仙於金蓬頭結社於張孟循盧伯良工詩文善古隸章草而畫尤冠絕一時寫山水極蕭灑興之所至不問姓名亦漫與之否則雖一筆不輕焉故傳世者不多嘗言居庸太行天下之巖險其雄杰奇麗皆古之名畫余所願見者今皆見之而有以懽吾志充吾操吾非若世俗者區區而至也李存稱之曰方壺蓋學仙之穎然者由無形而有形雖有形而終於無形畫能如是其至矣乎非仙

者孰能與於斯真人張宇初亦稱之曰壺仙云

盧大雅

盧大雅貴溪人混成院道士工詩有石砭樵唱其舟中
寄散木張外史詩云櫂郎催蹋春溪舫阻我辭君散木
亭江水未應春去漲鄉山偏向別時青烟波釣艇新衝
雨河漢仙槎舊犯星輸與仙都吉居士一簾山雨聽鶯
經顧元言云大雅爲張外史所知定非庸人

劉淵然

劉淵然贛縣人祥符宮道士有道術清靜自守不干世
事故爲累朝所禮真人張宇初之道術其所授也

傳同虛

傳同虛字虛堂崇元院道士以道法著名洪武初授格
神郎五音都提點左正一仙官主領神樂觀事掌天地
壇事卒賜祭葬

曹大鏞

曹大鏞字希鳴仙隱院道士洪武間賜號光岳先生授
道錄司左演法道法爲當時所稱

祝元衍

祝元衍號丹陽貴溪人上清宮道士能大字

張迪哲

張廸哲字如愚號朋山福建長樂人篆隸書俱精洪武十七年爲上清宮提點

鄧景韶

鄧景韶三華院道士永樂中授道錄司左演法奉勅改芝山堂爲棲碧堂御製詩并額以賜之

吳伯理

吳伯理號巢雲子龍虎山道士永樂中任上清宮提點隨四十三代真人訪張三丰遂入蜀居霍鳴山博通經史工詩文精篆隸亦能作枯木竹石

歐陽楚翁

歐陽楚翁字無塵龍虎山道士善畫山水枯木竹石墨
梅花四時之景尤工畫龍

周愚

周愚字蘊古與吳霞同爲龍虎山道士俱善畫龍

張畱紳

張畱紳龍虎山道士有詩見臨川胡琰大明鼓吹

連克章

連克章金谿人學道浴仙觀成化初赴召授道錄司左
至靈加太常寺寺丞陞太常卿欽差取經卒于京

王紹通

王紹通字用之金溪人大司徒禹錫之後出家鳳樓院
道法靈應天順間赴召賜冠劍法衣聖眷優渥四十六
代真人請紹通還山論道待以師禮授贊教兼掌真人
府法籙都提點

操克宏顏福淵黃嘉佑龔繼宗

操克宏佑聖院道士顏福淵洞觀院道士黃嘉佑繁禧院
道士龔繼宗紫微院道士宣德九年同被召奏對稱旨
俱授道錄司左至靈

李伯芳

李伯芳洞觀院道士以傳道致一真人邵元節贈宏範

真人

黃太初

黃太初邵元節之師也嘉靖間進贈清微安恬養默抱一履和守順凝虛體元翊教真人

段文錦

段文錦字素練安仁人洞觀院道士道法顯應祈禱如響成化間赴召廷對稱旨授真人府贊教

周應瑜

周應瑜字恆夫鳳棲院道士成化間勅授贊教法籙都提點號明誠文節先生所著詩文曰皆春集

邵元節

邵元節字仲康號雪崖安仁人達觀院道士從其師范
文泰李伯芳黃太初咸盡其術寧王宸濠召之辭不往
放浪江湖間嘉靖三年徵入京見於便殿雨雪愆期禱
有驗授清微闡教輔國妙濟守靜修真凝元衍範志默
秉誠致一真人統轄朝天顯靈靈濟三宮總領道教錫
金玉銀象印各一有事南郊命分獻風雲雷雨壇賜紫
衣玉帶勅建府於城西歲給祿百石以校尉四十人供
灑掃賜莊田三十頃蠲其租又遣中使建道院於貴溪
賜名仙源宮乞還山舟至潞河命中官迎入賜蟒及闡

教輔國王印先是以皇嗣未建數命元節修醮以夏言
爲監禮使文武大臣日再上香越三年皇子疊生上大
喜數加恩眷拜禮部尚書賜一品服十八年八月上躬
視顯陵元節畱京師一日晨起召其徒語之曰我殆將
逝矣安得走行在一見皇帝耶言訖卒帝爲之慟贈少
師賜祭十壇遣中官錦衣護喪還有司營葬用伯爵禮
禮部擬謚榮靖不稱旨再擬文康帝遂兼用之曰文康
榮靖追贈三代及師皆真人所著有太和文集

邵啓南

邵啓南號小溪元節姪也學道仙源宮從元節入朝授

道錄司左正一尋陞太常寺丞再授中憲大夫本寺少卿加一品服

陳善道

陳善道號石泉南昌人仙源宮道士嘉靖間從邵元節入朝授道錄司左正一尋授清微演教崇真衛道高士掌道錄司事元節卒賜太和府以居并八里莊又賜一品服兼朝天顯靈靈濟三宮住持

王用佐

王用佐安仁人浴仙觀道士嘉靖中從邵元節入覲上嘉其忠誠授元福宮住持賜八里皇莊

張定漢

張定漢貴溪人紫微院道士嘉靖初授本宮提點奏請重修上清宮廟宇

陶隱賢

陶隱賢安仁人浴仙觀道士嘉靖初從四十九代天師入覲授上清宮提點申明舊制奏免差徭

吳尚禮

吳尚禮餘干人達觀院道士偕邵元節赴召授道錄司左至靈陞左正一卒於京勅歸葬

王時佐

王時佐號獨峰安仁人達觀院道士授道錄司左正一
兼龍虎山大上清宮住持尋陞高士

方定相

方定相號一山餘干人達觀院道士偕師王時佐赴召
上愛其文雅授道錄司左至靈陞右演法

鄧貴甫

鄧貴甫進賢人能詩成一家言有集傳世

朱俊卿

朱俊卿金溪人浴仙觀道士精於道法歲旱請禱無不
響應

羅日文

羅日文精思院道士道法爲時推重河南伊王召論道
要臨還贈文以寵其行

歐陽彥富

歐陽彥富安仁人歲大旱金谿令禮延禱雨刻期霑沛
結旛示應民咸感之

周濟世

周濟世貴溪人混成院道士神宗時爲法籙局提舉道
法日顯島帥毛文龍及唐藩先後延致論道修醮既復
遊蜀畱保靖司者數年歸而卜築先天山以老焉

何海曙

何海曙字四和安仁人混成院道士崇禎間入覲沈相國尊重之待以師禮任本宮提點五十三代真人嘗訪道焉

國朝

高惟泰

高惟泰字凌雲環秀院道士爲上清宮提點年八十餘隨五十三代真人入覲值著勒拖親王病有邪爲祟

世祖章皇帝命惟泰出口治之日馳三百里至其地飛符驅治王疾頓瘥復

命賜銀幣還山年九十卒

何其愚

何其愚字特生安仁人海曙姪也出家紫微院性耿介不苟取與時巡撫董公尊重之嘗以千金爲壽其愚却不受尤抗直遇事無所迴避五十四代真人之少也遭家多難其愚爲之維持調護以迄成立真人年十六例應襲爵而地方大吏沮格不以聞其愚走京師訴于禮部其言慷慨悲激聞者皆爲感動而真人竟以此得襲上清宮門樓燬其愚募修之真人世家自五十代後無續輯者其愚私集五十代至五十三代事蹟爲一冊今

世家賴之得以傳其事焉年九十三無病卒

周大經

周大經字子篆南城人三華院道士妙正真人婁近垣之師也明習五雷正法諸家符祕任本宮提點好行其教於四方度弟子數百人江浙間羽士之精於道法者不問知爲大經弟子也蘓郡之潘元珪允章松郡之邱從高天山二人道法尤爲蘓松之冠並伊弟子云年七十卒葬富潭

年九十六

其子

其子

十卒其富職生安仁人海樓延也出家雲微院性耿介
寄居天山二年與長次為蘇林之族並野集于云平士
不聞吟嘯大強策七少蘇林之族亦赴文章林雅之雅
然然四六與策子樓百人其間陸士之蘇林並其
之祖少明登五雷王去諸家孫林并本宮點鼎致其其
佩大監宅子葉南林入三華劉黃士煥五真入莫立其
其子周大強其子其子其子其子其子其子其子其子
世寒敵之辭以軒其事為平次十三無敵卒為一册今

